<sup>股琦者</sup> 上下居住 上上一一

一飛煙天

全城弟兄姊妹翹首期盼,再接再厲添食作:

天國近了,你們應返他求

袁天佑 陳士齊 施諾 循道衞理聯合教會退休牧師

浸大宗教及哲學系高級講師

經典作《令人噴飯的謝飯》作者

誠意 推薦

青森文化





### 推薦序一



香港循道衞理聯合教會牧師

「堅離地教會」,乍看這書名,對教會是負面的批評。「教會」,當然是信仰的群體或是指教會的組織。但帶領教會的多是 牧者或一些資深的信徒領袖。作為牧者,在教會打滾了差不多四十個年頭,閱讀此書時,內心也有點不舒服的感覺。

但當我細看書中內容時,這種不舒服的感覺消失了。不是我完全同意書中所說的,而是感受到作者對教會的愛,對信仰的求真。我不會用「責之切,愛之深」來形容,因為我看不見作者對教會一些她認為不合宜的事情用嚴厲的說話去批判,只是用談笑風生(不是「嬉笑怒罵」)的字句導出來。她對教會的愛和她的信仰如何,只有她與上帝之間才能知悉,我們無從批判。不過,她所描述教會事情的種種,假若她沒有參與教會生活,也沒有與教會中人士交通(不是「膠通」)、聆聽和分享,必不能那麼深入知悉教會中的事。

書中第一篇文章,是其中一篇我所喜愛的。作者描述要成為 一個牧師的過程,都是我曾經歷的。當然我亦同意當中大部分過 程的需要,所以我也是這樣對待申請作傳道人的會友,只是小心 的不要將不需要的人物關係和主觀因素加進去。文章結語說:「多 點欣賞你教會的傳道人吧,佢哋真係過五關斬六將先嚟到你教會 工作架!」她還加上附註:「雖然唔知佢係咩講道質素……」不 批評教會的,不一定是尊重傳道人的;反之,肯批評的,他/她 可能是更尊重你的人呢!

教會「堅離地」是否不好呢?我的看法是:教會要「在地」,也要「離地」。「在地」,除了要關心地上的事外,也明白信眾也是生活在世,受到世界的價值觀和行為所影響;另一方面,教會也要「離地」,不能完全認同世界的價值觀和行為。書中其中一篇文章論及教會與政治,這是今天生活在香港的信徒所面對的掙扎。「政教分離」或是認同任何政治體系都不是聖經的教導,更不會因某人高舉自己是基督徒便支持他/她參政,因為人皆罪人。不論是個人、或在教會和社會,我們要追求的是公義、和平、慈愛與誠實。當然這不是易事,因為怎樣才是公義?誰的公義?……等問題,不是非黑即白,或是非藍即黃的選擇。作者指出教會「堅離地」,是因為我們的教導或是教會的生活,常脫離有血有肉的掙扎。

我已是退休的牧者,與作者年齡有很大距離。兩者對事物的 看法多不盡相同。但能與不同意見者,特別是年青一輩交流,永 遠是我樂意做的事。

# 堅離地教會實錄!

### 推薦序二

# 此書乃非常趣味盎然之作

#### 陳士齊

香港浸會大學宗教及哲學系高級講師

#### 吳國偉

大公神學工作室宣教師

教外的朋友,特別是體驗過好些教會團契生活、又尤其是在 2014 年後被教會的建制藍絲疏離的一群,會發現本書充滿「花生」,甚至會覺得看罷可以畫「花生漫畫」,因為這些文字將教會裡的「混世魔君」繪形繪聲描述出來。這些「耶 L」使耶穌基督的教會在社會眼中蒙羞,尤其那些早已厭倦教會的愚昧的新一代人,真的要忍不住罵聲「Jesus!」

新世代已經無法再忍受教會愚蠢和「堅離地」的性格,他們返教會就像在「潛行空間」裡發夢:當今社會極速沉淪,但教會仍在夢鄉之中!而虔誠的教友,卻或多或少像電影《優獸大都會》(Zootopia)中的樹懶一樣,永遠開啟著「樹懶懈怠模式」(sloth mode)過那守舊的教會生活:他們總像觀照平行時空一般空靈,漠視教堂窗外的社會。不論政治運動領袖梁天琦被判處監禁六年多,抑或近年香港多個基建項目腐入骨髓、鋼筋造假「無腰骨」,教會都一概漠視——就如那些自稱基督徒的建制派

議員一樣「無腰骨」——這些爛攤子和這些糟糕透頂的人,終必 從核心向外崩塌。

#### \*\*\*

在過去未有互聯網,甚至未有中文電腦輸入的年代,所有思 緒都必須先手寫在原稿紙,然後艱苦轉錄或印刷成手稿。那時對 教會進行批判是艱難、沉重而乏味的,有識之士無謂為之,最終 批評只會淪為口耳相傳的八卦。

可幸我們現在有了互聯網,年輕一代能輕鬆輸入中文, 上載到各種社交媒體 app 和網站,從 ICQ、MSN、Xanga、 Facebook、到 Whatsapp 以至 Telegram,聊天互動相當密集。 每週的教會生活,在這些平台中都能巨細無遺地記錄、反覆討 論,並儲存在雲端。然而,這些資料需要下載、整理和敘述,讓 教會內外都能看到,而殷琦正正為我們做了這樣的服務,並且做 得極為精細。

在「那些年」(四、五十年前,因為我們年長得多),即使是像我這樣熱心的教會批評家或分析家,也只能夠對香港教會進行純粹內部的分析,包括崇拜、教導、團契或相交、見證和服務(worship, teaching, fellowship or communion, witness, service)這五個教會日常運作領域當中的事務。其中只有一兩

種類型的活動會觸及外部世界,例如「服務」(service)與「傳 福音」。儘管「服務」的根本含義應更廣泛,並已融入崇拜概念 之中(值得注意「返崇拜」也是「返 service」),教會卻將之 翻譯為「事奉」,變成只針對教會成員(和上帝?),而不是教 會以外的人,就好像教外人跟上帝沒有任何關係一樣!

至於「見證」,通常表現為各種「傳福音」活動。然而正正 是這一點,為福音傳道的見證者往往表現出最為諷刺的特性 —— 「堅離地」基督徒組成的「堅離地」教會,憑甚麼「報佳音」? 對香港普通公民而言,他們面對的問題是嚴峻的個人生涯規劃, 挨不起超高的中產生活、供不起天價的劏房,即使能有房棲身, 他們與下一代亦會困在狹小的空間中,被迫面對尖銳的跨代文化 矛盾——他們需要的並非教會所報的「佳音」!

殷琦一直「堅(不)離地」寫這本書,全方位立體掃描基督 新教堂會的內部運作,同時緊緊抓住讀者的好奇心,讓他們理解 這些光怪陸離的現象:其權力架構與教導如何生成「堅離地」教 會,從而使年輕一代感到疏離;其荒誕反智的意識形態,使教會 與最前衛的計運組織及計會運動永遠對立;當今教會產生的無數 異端;而最詭異的,莫過於對壓迫社會和構成國家不義力量的「無 鋼筋骨叩頭幫!!

當然,我們不能要求殷琦本人或者她的同類作家,幫大家深 入反思這些有趣的教會生活和行為細節,甚至提供有說服力的神

學分析和治療建議(不要放棄治療!)來改善教會種種荒謬現 象。即使是教會的神學家,也未必能提供答案——因為他們很多 時就是問題的一部分!因為我們實在懶得把笨重的脖子稍為扭 轉,到教堂外面看看(又是一些「優懶獸」),試著去關顧我們 身處這個社會的水深火熱。

真正稱得上是「神學家」的人,應該正視殷琦及那些忠實地 參與社會的年青基督徒提出的問題,向他們宣講上主的道,指引 他們當行的事。配稱神學家的人,現在正是時候作「神的僕人」, 先向教會、再向充斥貧窮與不公義的香港社會、宣講上帝的真 理、正義、救贖與和平——這正是香港社會當下渴求的,阿們!

> 陳士齊先生序、吳國偉先生譯 二零一八年六月廿二日

8

# 准筐吊一

#### 施諾

經典作《令人噴飯的謝飯》、《死後可幹的事》作者

踏入二十一世紀後,新無神運動興起,其任務是要把宗教從 人類的文明趕出去。加上人工智能大躍進,使群眾相信人只是由 基本粒子組成的生物機械人而已,《聖經》只抄襲神話,不是啟 示。年青人很容易在網上找到以上的資訊,回到教會,心有疑惑 可問誰?年青人只看到教牧和資深信徒善於內鬥:和自己教會同 工鬥,和不同教會、神學院的教牧鬥,滔滔雄辯,引經論典,十 分威猛。但面對新無神運動的時候,卻啞口無言,不知道、甚至 根本不想知道發牛甚麼事,堅離地。

如果年青人嘗試摒棄理性,憑單純信心、愛心實踐信仰,會 發覺教會有另類堅離地。教會只懂全力進行五反:反同性戀、反 婚前性行為、反信徒和非信徒拍拖結婚、反離婚、反自慰,好像 這個世界只有性和婚姻的議題。但面對教 的性侵犯和性騷擾, 教會完全雙重標準,只會大事化小,結果欲蓋彌彰,自取其辱。

年青人眼見政府多行不義,但教會不為民發聲,只說要順服 掌權者云云,不要搞事。教會像生活在另一時空,逃避責任,超 堅離地。1

理性不成,感性又不成,為公義發聲又被教會壓下去。如果 我是年青人,情願上網打機、用手機聯絡各方好友、泡仔泡女更 寫意,生活堅貼地,哪怕空虛寂寞。上教會?免了。

我首次聽到有基督徒用「堅離地」這三個字形容教會,是在 2016年。我讀到一本書叫《堅離地教會實錄》的書,由殷琦所 著,是她的首部著作。我有幸為她寫推薦序。我私下送贈數本《堅 離地》給我身邊的基督徒朋友,希望星星之火可以燎原。

我和殷琦素未謀面,私下 pm 也沒有,但讀她的書和文章的 時候,感覺到她像我一個朋友,坐在我身邊,和我暢談教會的堅 離地現象,輕鬆自在。她對教會的問題有良好的觀察力和洞察 力,能夠從多角度探討,不拖泥帶水,直擊要害,是近年反思教 會問題的佳作。

我建議讀者不只私下閱讀殷琦的書,更希望做「一領一」運 動,把這本書介紹身邊至少一個基督徒。一個人的力量是微小 的,但星星之火絕對可以燎原。我認同她在書中的一段說話:「我 們的牆是無形的,但我們可以嘗試由身邊的人開始,鼓勵思考、 鼓勵發問、鼓勵合乎情理的挑戰。多用 common sense、少聆 聽威權的聲音、敢於求變、尋找同行之人,必有出路——千里之 行、始於足下,耶能也可以出城!別小看每一個人的力量,我們 絕對也能夠創造屬於我們的,教會的時代革命!我要拿起槌仔開 始鑿了,你呢?」

### 自序

# 若你喜歡怪人,其實我很美

今次,我想先和讀者們分享一件關於我的成長小事。

當初接觸倫理學是中六的時候。當時我會考宗教科拿 B 嘛,就心想,總之唸自己最拿手的科目考上去就是了,當時連宗教科要連著倫理一起讀都不知道(中學的我大部分時間都是一舊飯團咁)。孰不知,這就為我開啟了知識的大門。(我也希望藉此感謝預科聖公會聖馬利亞堂莫慶堯中學的栽培、倫宗科主任鄧老師的教導,希望佢唔好怪我上堂成日瞌眼瞓。同埋感謝母校,畀我識到我未來老公~而呢一科最後都 A 咗,因而順利就讀港大。)

倫理學真的是一門很有趣的科目。它作為哲學的分支,比較落地、實際,探討各種各樣的社會、價值、道德的問題;讀書、學知識,讓我第一次感到由衷的快樂。而最重要的是,讀倫理讓我明白到一點:有些問題、討論,沒必要有標準答案。倫理學當中有些理論,甚至是有問題的、未完全的,但在過程中,我明白到何謂「慎思明辯」,為自己的陳述建立清晰的理據。只要我們「明白自己的思路」,哪怕最後得不到答案,也能無悔,因為我們是最誠實、勇敢面對問題的人。

而慘就慘在,基督教常常「以為」自己就是答案,還要是在 沒有充分理據、曲解聖經下得出的答案,或甚至是「為政治服務 下的產物」。然後,你會見到教會、社會一籮籮的問題,但沒有 基督徒發聲。於是,我疑惑了:究竟怎樣才是基督徒?我信的是 甚麼?是神?是教會?是聖經?是牧師?

還是,我應該要相信自己的思考?

這,大概就是我這麼喜歡批判基督教的緣由吧。

於是,倫理學、哲學的書成為我的興趣讀物,床頭放一本、 袋又放一本。有時在車上看得起勁,真的想就地歡呼、與人分享。 能「慎思明辯」,也許就是人類的幸福。不懂思考的信徒們,你 們的幸福在哪?

我想……我想大家都幸福。也許在你眼中,我有少少怪,甚至唔可愛;但、也許、其實我很美。

陳奕迅 《大開眼戒》 情人如若很好奇 要有被我嚇怕的準備 試問誰可 潔白無比?

如何承受這好奇你有沒有愛我的準備 若你喜歡怪人 其實我很美

# 目錄



推薦序一:袁天佑牧師		2
推薦序二:陳士齊、吳國偉		4
推薦序三:施諾		8
自序:若你喜歡怪人,其實我很美		10
堅離地教會現象		
要成為一個傳道人到底有幾難?		17
十種教會經典人物		23
崇拜之千奇百趣		28
・會眾篇	28	
・講道篇	31	
・崇拜與世界的平行時空	35	
<b>專契內的「膠通」</b>		38

信耶穌能解決所有問題?探討解難神學		42
· 上帝就是解決世間所有問題的鑰匙?	42	
·解難神學的生活體現——政治篇	46	
·解難神學的生活體現——傳道篇	48	
・結語	51	
大型特會的海市蜃樓		54
堅離地教會制度		
主阻地纵目的发		
終極教會山寨王——談終身執事制		63
談宗派與「耶教諸侯制」		66
·歷史遺物的宗派制度	66	
· 耶教教會山頭主義——耶教諸侯制	68	
改革教會的方法:破四舊立四新		72
談教會的世代之爭		78

#### 堅離地異端奇說大觀園 耶教異端奇說大觀園 83 錫安之亂從何而生?剖析錫安之謎 87 為「邪」而「邪」最可怕——全能神教會 96 瀆職貪污又判監的韓國 Oppa 牧師 101 迷戀神秘數字的神學觀 105 飛天意粉教 ——無神論者的反動 108 結語 113 堅離地耶能 假面耶能最可怕 119 耶能「掩耳盜鈴」式教育大法 122 當你與身邊耶能分享政治事件 126 以父之名——上帝躺著也中槍 129 返教會衣著趣談 132 堅離地耶人觀點 從劉曉波的死,看「崩壞」的因信稱義 137 不能直視的事實——人有性慾 144 基督徒如何理解絕對的邪惡? 148 教會紛爭,教內解決 152 「正」到失控——談耶教正能量文化 156

160

耶論 Pokemon

### 堅離地耶教愛情觀

教會中女是如何煉成的?	165
「未婚情侶唔畀去旅行」的潛規則	168
基督徒夫婦婚姻會美滿啲?	172
婚前禁慾:在現今社會還適用嗎?	177
教會與同性議題的長期抗爭	183
耶圈怪事一籮籮	
死咗都被激到復活的	193
以勒基金的禱文——耶能的思考縮影	197
主愛臨香江:大型佈道會的存在價值	201
再狙擊主愛臨香江:欲蓋彌彰,所謂何事?	205
後記	210



# 要成為一個傳道人 到底有幾難?

返了教會多年的朋友,當你面對傳道同工,不知大家有沒有 想過一條問題:究竟如何才能成為一個傳道同工?這篇文,就是 傳道人的育成揭秘——既然講得出是「揭秘」,就當然不是講講 甚麼「使命」、「呼召」、「異象」這些「阿媽係女人」的真理。 做傳道這回事嘛,當然是要上帝呼召啦,但究竟呼召之後,當中 又有多少關要過?

要成為一個傳道人甚至牧師,在香港基本上要經過以下幾個關卡:

- 1. 做住啲唔關事嘅工先(最少一年,多至兩至三年均可)
- 2. 成為宣教幹事/基督教事工(最少一年,多至四至五年均可)
- 3. 獲得教會推薦
- 4. 讀神學三年
- 5. 成為傳道人
- 6. 再經過三五七年
- 7. (經過天時地利人和) 成為牧師

### 做住啲唔關事嘅工先

如果你未大學畢業就已經有成為同工的心志,通常都會聽到 咁樣嘅回答:出嚟做下幾年嘢先啦!其實這個說法的意義在於, 希望傳道同丁有比較多的社會經驗,能在牧養上更有效,更明白 一般打工仔的生活同掙扎,咁其實都係好真確嘅。

### 食物鏈最底層: 由成為宣教幹事/基督教事工開始

宣教幹事/基督教事工,大概等於教育界中的 TA:又未做 到傳道人住,但又可感受下教會工作及日常,幫手執頭執尾,又 帶下團契/小組,總之就係教會大打雜。點解要由宣教幹事/基 督教事工開始做起?都係果句,做傳道前,要有咁上下教會/機 構經驗都是正常的。另一主要原因,是確認你服侍的心志。萬一 做做下先發覺,唔係喎其實我唔想做呢個,咁仲有離開嘅餘地; 但如果讀畢神學,先發現唔想打教會工,咁絕對係浪費咗神學院 的寶貴資源(同埋你啲學費)。另外,事實是教會工作非常繁重, 很多有心志者在宣教幹事/基督教事工的一關中,已深深體會建 制內的腐朽(?)、又或者做到 burn out 哂而選擇退場。(至於點 解打教會丁會打到 burn out ? 呢個又係另一個問題啦……)

但,要成為呢個「大打雜」,都不算容易。因為即使做宣教 幹事,也要有教牧同工推薦信,而入讀神學就要推薦信加堂委/

執委同意,教會先會課金畀你讀書。所以你唔識做以下幾點,就 已經入唔到呢個關卡:

#### 1. 識人好過識字是永恆的真理

從你想成為傳道人開始,「建立好的人際網絡」一定是最重 要的一環。識多啲大粒佬,討好(?)佢哋啲歡心,總之係能夠喺 大場合講嘢有人聽嘅人。一旦有他們幫你寫推薦信,你離入讀神 學就已經跨咗一大步!

#### 2. 有大粒牧師加持, 仲有堂委會嗰關

**堂委/執委會,可以說是教會的最高權力架構,負責決定重** 要事務或方向。但事實上,愈大粒就愈離地——無嘅,就係由一 班唔係太認識你、甚至同你 say hi say bye 嘅人,去決定到底你 讀唔讀到神學。咁呢班堂委到底會睇啲咩條件呢?

首先,教會的出席率代表了你的投入度同推薦成功的機會。 你唔好以為上帝呼召你就大哂喔,你有無恆常出席 take up 咗 嘅事奉先?出席率有幾多個百分比先?事奉係咪投入先?表現點 先?有無容易得罪人多稱呼人少先?一旦去到要讀神學的層面, 呢啲嘢就會全部拎番出嚟講。

還有,不單止你的日常投入度,連你的感情生活,都會被人 搬上枱用顯微鏡檢查清楚。感情生活「史」絕對是堂委/執委其

中一個明顯的考慮因素。以前在教會有沒有四處「食」女/仔? 有過幾多個男/女朋友?他們是否信耶穌?「食」女/仔範圍是 只限自己小組團契,還是全教會通殺?如果單身(加上已經有一 定年紀)就會問,點解你唔拍拖?遇唔啱定咩原因?(定係基!) 如果是拍拖者就會問,對方係咪信耶穌?拍咗幾耐拖?有無預備 結婚?幾時結婚?

簡單而言,你單身又死,拍緊拖又死,最好就係結咗婚。堂 委的部分考量在於,驚啲單身神學牛入到實習教會,萬一搞男女 關係咁點算?咁好難同其他教會有所交待(所以又很難說教會不 對……但也說不上有多對就是了)。總之,佢哋無興趣你嘅家庭 生活史,但就要 check 哂你人生嘅感情生活史。而最好的答案, 就是如「有拍拖,對方信主,下年結婚」之類,咁佢哋就一定無 聲出。

而日,聞說唸神學的人,由於課業十分繁重,而日基本上一 定要住宿,根本是與世隔絕的狀態,所以有拖拍者絕大部分都會 「用拖」,而「拍住拖讀神學」更是十分少見。結果,大部分進 得去神學院的人,已經有「三年食長齋」又或者「入去再睇下有 無機會同同學拍拖」的覺悟。不過,還有一種比較少見的情況就 是,索性早點結婚,一勞永逸。

如果你真係咁叻叻,經過哂上述咁多關,登登!你的獎勵就

是得到教會加持,有部分教會會畀一筆 sponsorship,條件是對 方讀完神學後會回來教會工作幾年。(嘩,即係等於一畢業就有 工開,正!)如果你唔夠叻,喺上述任何一關 PK 咗,咁都無話 咩嘅,你都可以選擇自資讀。但,沒有建立足夠的教會人脈,就 好難擔保你有丁聞……

而且,基督教教會的堂會,山頭主義現象十分嚴重,即是例 如你在宣道會信主受浸,你幾乎就等於是宣道會的人,要去播道 會工作是極難的。有一些堂會,勁到有自己的神學院,專出產給 自己的堂會;又例如,某些神學院被認為「太激進」,因而很難 進入教會牧養。哼哼,一切一切,也只是人的所為吧。上帝?佢 只係喺「呼召」嗰 part 出現下咋嘛, so sorry, 好明顯係閒角啦!

\*\*\*

可能你會問,嘩癡線,有呼召嗰個係我喎,點解我要經過上 述呢啲重重關卡, 畀呢班堂委/執委決定我能否入讀神學的生 死?點解上帝在傳道人的育成之中,居然變咗個閒角?

無錯,事實就係咁。我無法完全認為教會這樣做是錯,成為 傳道人之前,我甚至覺得以上這些歷練某程度上是必要的。而教 會作為一個確認的關卡,執得這麼緊,其實是無可厚非,因為教 會正正是一個對「人」的群體。只是,如果牽涉到大量個人隱私,

甚至是由他人的主觀眼光去「評核」你所做的私事是否正確,又 確實是有點過分。而用一個如此數據化、量化(但同時又咁主 觀……)的方法去「評核」人的「教會表現」,從而決定一個人 究竟有沒有機會唸神學,又是否真的好?實在值得教會深思。

所以,粗略一計,如果你從「做住啲唔關事嘅工先」開始, 到讀完神學(都未計你開始返工),是一個少則五至六年、多則 十幾年的過程。在香港,你要建立一門專業,大概也同樣要這麼 多時間,其實是一個很大的投資。所以,多點欣賞你教會的傳道 人吧,佢哋真係過五關斬六將先嚟到你教會工作噼!(雖然唔知 佢係咩講道質素……)



### 十種教會經典人物

當你返教會返到一個程度,你就會發現不知為何,一間教會 總會有以下的經典人物,他們的存在,簡直是教會的靈魂(咦, 教會嘅靈魂唔係上帝咩):

#### 第十位:被排斥的人/ social awkward 毒 L

教會是一個(表面上)好接納人的地方,但事實上就是「不 能埋堆者死」。多年來,我發覺當教會面對一些較特別的人,例 如智力低於常人的肥胖症患者、精神病復康人士,或者極不擅 社交的人等等時,一開始當然會接納他們;但實際上,弟兄姊妹 卻完全沒有接納這些人的心理準備。他們繼續有自己傾計埋堆熟 絡,被排斥的繼續被排斥。所謂「接納人的地方」,其實只是一 個假象。

同時,不止這類特別人士,一間教會,總會要有一兩個 social awkward 毒 L 出現。他們通常長期活在打機世界,極不 擅長社交,經常做「話題終結者」。教會這個地方,最緊要就是 懂 social, 久而久之, 埋不到弟兄姊妹堆的話, 等於終日做遊魂 野鬼——無處容身呀。

### 第九位:煩膠長輩 Uncles / 與世無爭終日傳福音 **Aunties**

這班 uncles 和 aunties,大都超過五十歲,已為退休人士, 被視為教會中堅分子第三小隊,皆因奉獻最多銀兩亦出力最多。 可能因為喺教會都有咁上下勢力,佢哋最鍾意就係教訓年青人, 炫耀事奉經驗同埋聖經知識,但其實大部分有料扮四條。

而眾 aunties 的教會任務有幾種,例如查經、派物資、照顧 細路,和最重要的伙食安排等,都是由她們重點負責。而最最最 重要的,就是 aunties 們特別有傳福音的心志,由街頭傳道至監 獄傳道,上天下海都會找到她們佳美的腳蹤。而且,她們能一鼓 作氣就問「你覺得你死咗會去邊?」而一啲都唔感到老尷!

#### 第八位:中規中矩、只信不事奉的平信徒

這班人亦是教會的中堅分子,不過他們歸不到一「隊」,因 為他們的存在就是他們的意義——就只是一種純粹的存在。他們 上教會的目的,衰啲可以是為「阿仔入嗰間學校嘅分數會高啲」、 好啲可以是為「心靈得平靜」。他們基本上只會出席崇拜,頂多 加個團契,總之要佢哋做少少嘢,總係會聽到佢哋 say no——因 為他們的存在,只是為了「take」,而沒想過要「give」。雖然 這班人在教會無甚建樹,但勝在蟻多都嬲死象,沒有他們支撐教 會,人數必定會跌至新低。

#### 第七位:萬用工具年青人

幾時都話,「年青人是社會未來的棟樑」,在教會亦如是。 一間教會,總有至少一至幾十個「萬用工具年青人」,視乎教會 的幸運程度。(還是栽培青少年的能力?)他們大都是高中至職 青的年紀,被視為教會中堅分子第二小隊。總會有些超級虔誠的 年青人,敬拜、杳經、帶組樣樣皆能。但,佢雖然有實力,但未 有財力,所以只能排在第七位。而當他們步入社會,也只能由「教 會萬用工具年青人」變成「社會萬用工具年青人」,到時工作的 辛勞就會漸漸令他們淡出教會圈子——又或者,幸運的話,也可 能會成為真正嘅教會棟樑嘅。

#### 第六位:漁翁撒網溝女溝仔王

如果你曾經在大專、職青團待過,對於那些飢不擇食、漁翁 撒網的溝女溝仔王一定不會感到陌生。教會之所以吸引人(來溝 仔溝女),最大原因相信是因為純品——當你進入社會工作,真 的,你就會知道教會的人,大部分衰極有個譜(但要好衰嘅,我 信上帝都禁止唔到)。

但,純品是有代價的。代價一,大部分教會人士都不怎麼會 打扮(甚至是不懂打扮),你要搵又 pure 又 true 又有睇頭嘅 並不容易;代價二,就當然是婚前禁慾啦,除非你哋能夠唔畀人 知。不過,姑勿論呢啲溝女溝仔王係咪信主一方,結局都係被人 排斥,因為弟兄姊妹一旦互通消息,就知道咩事,即時對他們敬

而遠之——其實又唔係嘅,無腳雀仔終有靠岸的一日,到靠咗岸 又過番三五七年,咪重建番另一個形象囉~

#### 第五位:(女生限定)嫁杏無期的 AO 聖女

在男少女多的香港,教會亦不免俗的面對同樣問題,當中尤 以女性較多。這類女生在十八二十青春無限時,大都有教會不同 的男生追求,但因各種原因,例如眼角高、條件、性格、事奉等 因素而無法繼續。隨年漸長,身邊人開始成雙成對,而自己卻一 個人時,她們就會開始懷疑自己是否有獨身的恩賜?繼而以不同 方法,證立並相信神會安排自己嘅婚姻,急嚟都無用,完全一句 「上帝會帶領」就算數。她們大都非常投入教會事奉,全人獻上 咁滯(唔使拍拖當然多啲時間放在教會啦),愛情觀極度保守, 但同時又極度敏感,甚至對同佢傾計嘅男仔都會過分敏感或者會 錯意,惹來種種笑話。

#### 第四位:專吸異性返教會的女神姊妹/男神弟兄

這類惹人艷羨的角色通常只有一個半個(而且唔好妄想嗰個 係你啦~你最多都只係佢哋帶返嚟嘅兵仔~),他們就是真心有 仙氣而又好有心事奉的教會姊妹,或者多才多藝的男神弟兄。他 們是少有懂打扮又有氣質的一群,所以「吸異性返教會」的能力 都幾強下,你時不時便會見他們帶一兩位疑似是兵仔的人回來。 即使大家都明花有主啦,他們仍然保有「吸異性返教會」的能力, 就好似李氏力場般歷久不衰,簡直就係教會人生勝利組!

#### 第三位:山寨王執事

山寨王執事這個題目,後文會更詳細講述,在此先不詳贅。 做得執事,喺教會都叫有咁上下勢力,可謂教會權力的核心內圍 (而我哋只係喺核心外圍咋!),而終身執事更能獨攬大權。雖 然呢個權就無利可圖喫啦,但不知怎地,無金錢作支撐的權力卻 同樣令他們大為迷戀,呢個究竟係咩玩法?

#### 第二位:維穩牧師

一間教會,點少得一個維穩牧師?牧師作為教會的頭,當然 是要帶領會眾平平安安度過每一天,咁大家先能夠得閒傳福音同 返崇拜。而講道中,點少得失驚無神彈啲維穩 idea 出嚟,甚至 稱讚而家當權的政府?嗯,都係嘅,如果畀共黨發現你哋散播港 獨思潮,分分鐘拆埋你十架、cut 埋你資助、DO 埋你間教會呀! 所以,大家誤會哂我哋親愛嘅牧者啦!佢哋係為咗教會好咋!畀 啲掙扎,呀唔係,係畀啲體諒呀!

#### 第一位:隱形有錢佬

隱形有錢佬的真正身分、現有財力與年齡均不明。說了是隱 形,他們當然不會這麼容易被你發現——而他們亦被視為教會中 堅分子第一(無錯,唔係一隊嚟,因為只有一個!如果要湊成「一 隊」,就要視乎教會的幸運程度),實是當之無愧。因為,唔好 講咁多廢話, no money no talk, 無人課金, 豈能成擴堂之夢? 所以,隱形有錢佬是一間教會必要的存在,無咗佢就等於摺得!



### 崇拜之千奇百趣

「崇拜」,我細細個就聽過呢樣嘢啦!作為一個基督徒,你 可以未懂得祈禱、靈修、讀經乜乜乜,但是你不可以不去崇拜—— 從你成為一個基督徒的那刻開始,「崇拜」就好似一道咒語般, 「你生是『崇拜』的人,死了上到天堂都是繼續做『崇拜』的鬼」 (?)。但是,去了那麽多年崇拜,大家有沒有經歷過一些崇拜千 奇百趣事?今次本人除漫談個人見聞外,亦在臉書收集讀者的崇 拜經歷,不知道你又有沒有遇上過?

#### 會無管

#### 崇拜時睡覺

「睡覺」,首選一定是談崇拜時睡覺。

我以前教會有一位做敬拜隊事奉的中年大叔,每次敬拜時都 非常誇張,高舉雙手好陶醉的樣子。但是,之後當他坐在崇拜的 第一排椅子時,每次講道他都會睡著,無一例外——而月睡相超 誇張,口張開口水滴,有時坐在他旁邊還真是哭笑不得。更有人 聲稱見過有人瞓到舂落地,都咪話唔誇張。<sup>1</sup> 阿大佬,雖然係悶 **唿啦,但你上一秒先忘我敬拜完喝!落嚟五分鐘都無就瞓著,直**  係好難說服到我覺得你尊重個崇拜囉!你係咁眼瞓,選一堂帶敬 拜就好啦,失禮之餘,你對唔對得住上帝先!

而日,我覺得大家對那句甚麼「你們不可停止聚會」已經去 到一個中毒至深的地步。有時崇拜坐在後排極目而望,每兩三行 都總能找到一兩個人打睏。身體軟弱不是問題,咪扳屋企休息 囉,何苦返嚟瞌眼瞓呢?如果真的工作疲倦至此,不如每三星期 休息一次,在家睡多點、養好精神,就不要硬去崇拜把講道當成 white noice 睡覺啦!每次我返崇拜,我都希望自己真的儘量不 打睏,提起精神,起碼有精力聽講道(不過總有崩潰的時候,皆 因講道長短又是一個大問題……)。根據非正式研究,成人的長 時間集中力一般有二十分鐘,三十分鐘開始心散,四十分鐘已是 極限。如果一場講道可以控制在大約二十至三十分鐘長,我覺得 應該起碼是不會打睏的。聽道五分鐘就睡著的人,我想大概是連 堅持的意欲都沒有吧!

#### 遲到

崇拜遲到,相信是每間教會都會遇上的問題,差別只是嚴重 與否。根據非正式研究<sup>2</sup>,會眾遲到早退的比例均屬 25%,即是 大約每四位就會有一位遲到、早退,都咪話唔少。而遲到多少也 是重點,一場崇拜約一小時十五分鐘,如果遲到超過半小時,咁 不如唔好嚟啦。

堅離地教會現象

<sup>1</sup> 感謝讀者 Alan Lau 提供。

<sup>2</sup> Peter Koo'、〈「崇拜」準時,是「必要」嗎?〉,「Peter Koo's Blog」部落格:https://bit.ly/2K88PHO

30

其實,崇拜遲到,多少反映了我們有多重視崇拜。如果你初 次約會男女朋友, 睇你夠唔夠膽遲到!事實上, 我哋又真係去唔 番嗰種「起初的心」喎!咁究竟,個問題出咗喺邊……?

#### 玩電話

隨著智能手機興起,「崇拜時玩電話」真的變得好難搞。 無可否認,你開住部電話就係一個引誘嚟,襟襟下電話就去咗 Whatsapp、Facebook、Instagram……甚至去咗交雜費。3但 是,智能手機其實也是一把雙面刃。同一部手機,你可以用嚟上 網打機,亦可以「用電話打崇拜 notes」,又或者環保啲,「用 電話睇崇拜單張」。所以,真係好靠會眾自律啦。不過,有讀者 分享話見到有人洗禮前一刻都仲襟緊電話<sup>4</sup>,就真係激動咗。喂, 你係全心獻畀上帝定全心獻畀個電話先!講清楚好喎!

#### 剪指甲

其實我覺得,香港應該要立法規定「不可以帶指甲鉗出街」。 「剪指甲」呢件事就好似大小便咁,所有人都會做,靚女都會屙 屎,但無人會周地去噼嘛(除咗……you know)!你剪指甲啫, 但你啲指甲飛出嚟彈到人喎!好恐怖呀……

3 感謝讀者 Jacky Yim 提供。

4 感謝讀者 Wilson Sar 提供。

話說呢個剪指甲事件,我曾經聽過有傳道人在講台上講過, 孰不知今次又有讀者分享。5好啦,剪指甲本身已經核突,大家 崇拜期間仲要無得避開,逼住睇你啲指甲彈來彈去。但是,究竟 點解崇拜要剪指甲?呢點真係百思不得其解……

#### 細路嘈生哂

細路這回事嘛,真係喺邊度都麻煩(雖然佢哋都好可愛~)。 喺飛機上麻煩、喺巴士上麻煩、就連在崇拜上,都一樣帶畀大家 頭痛嘅事情。事實上,大人都瞓著啦,小朋友捱不住,嘈喧巴閉 亦是常理。所以有不少教會都設有兒童主日學,讓小朋友有自己 的崇拜,講下聖經故事呀咁,其實對大家而言都是好事吧?

#### 講道篇

崇拜最核心的部分是講道,相信大家都應該不會有甚麼異 議。返咗十幾年教會,聽過N篇講道,但對於以下講道的小事情, 本人仍然百思不得其解:

#### 問候身邊人

問候身邊人呢個「習俗」真係唔知由幾時開始。大概是十多 年前左右吧?當時大型特會開始興起,而大型特會其中一種最

<sup>5</sup> 感謝讀者 Jacky Yim 提供。

愛做的事,就是「同身邊的人講,XXXX!」XXXX 可以簡單如 「哈利路亞」到一些很長句子,例如『記得每一天都要祈禱、聽 到聖靈的微小聲音』。特會氣氛通常很好,大家在氣氛底下講 「XXXX」都覺得還好,但不知怎的這文化就慢慢傳入教會中。 在高峰期,我還真的聽過一篇道,每隔五至十分鐘又要同身邊人 講啲咩咩咩。嘩,個感覺似揼波鐘強啲喎,唔好咁啦!究竟講道 者點解要加入呢個環節?係咪覺得氣氛好啲,大家會記得篇道多 啲?

回頭一想,其實產生這種現象,會眾同樣要負責任。近年隨 著 mega church 興起,會眾對講道要求愈來愈高,聽道好似變 听要睇 show 咁。有供就有求,講道者有如此傾向,希望會眾投 入講道之中,似乎亦無可厚非。但其實講道又唔係棟篤笑,如果 大家是抱著正確心態去聽道,又會不會發展出此類的講道現象 呢?

#### 重複提一個字眼

基督教好流行一個講法,就是「當重複提一個字眼嘅時候, 呢個字眼就好重要啦!」(阿媽是女人?),這一點相信跟查經 的 OIA method 好大關係。<sup>6</sup> 記得在青少年時代,話說當時我們

6 作者按:OIA 是一種於教會廣泛使用的查經方法,O 為 Observation、I 為 Interpretation、A 為 Application。詳情可參閱以下文章: Vagabond,〈讀聖經的困惑〉,時代論壇,2000年6月15日,網址: https://bit.ly/2HpY8iy 當中的 Observation,經常要求查經者找出聖經中重複的字眼。

教會有個牧師有一篇道的題目,名為「這是天父世界」。而鑑於 我和我的朋友都非常無聊,我們又知道該位牧師很喜歡重複題 目,於是我們好專心聽道,並劃正字來數數他講了多少次「這是 天父世界」,結果講了七十幾次!「這是天父世界」,是我畢生 最難忘的道之一呀!連首回應詩,都係叫「這是天父世界」呀!

#### 講道長短大異奇趣

不知道神學院有沒有規限講道的長短,但事實就我所見,講 道通常從短則二十分鐘、長則超過一小時不等,依不同教會情況 有所不同。嘩,唔係呀嘛,有咁長?無錯,真係有咁長。但長唔 緊要,問題係好多時候言之無物,求其搵幾段經文就開個自由球 亂嗡;亂嗡都唔緊要,問題係亂嗡太耐啦真係!講道嘛,其實重 質不重量,點解要講咁長呢?

曾聽過一個言論認為「並非每位傳道人都有講道的恩賜」, 對不起我實在無法認同。作為傳道人,「講道」就是最基本職責。 你可以「唔係好叻講道」,但就絕對不能「講道好差」。而且, 坦白講,亦不可以以「工作很忙」、「眾會很多」等等,作為沒 有預備好講章的藉口。我咁講可能好不近人情,但,崇拜係宣講 「神嘅話語」 喎!我認真啲都唔得?

本人完全沒受過神學訓練,所以跟我說甚麼崇拜學呀等等, 我完全不懂。但我以平信徒身分出發,覺得講道最重要最重要就 是:言簡意賅、啟發自我、付諸行動,完!言簡意賅,是因為我 深深明白一點——聽道者的接收能力極為懸殊,從八十歲婆婆到 二十多歲的博士都有。崇拜時做研經呀、深入講解呀之類,婆婆 就會打瞌;說些廢話、言之無物,就輪到年輕一代鄙視你。所以, 言簡意賅就好,研經部分不要超過講道時間的一半。

而「啟發自我」及「付諸行動」均是非常重要的。所謂有諸 內形諸外,你的內在如何,才是你行動的原動力。我覺得現時的 講道,要不太側重啟發自我,變成「識講唔識做」;要不,就是 只有付諸行動,變成形式主義的「識做但唔知為也要做」。其實 有嘅,一係就淨係叫你「讀經靈修事奉多相交」,一係就叫你「唔 好搞咁多社會運動」……呀嘛。

當然,講就容易做就難,但係啲人又成日話我唔畀建設性意見,(開大聲公講)我而家畀咗啦!!!!!!!!呢個就係一個平凡嘅平信徒嘅意見呀!!!!嗱你唔好話要我講篇道出嚟 先叫做畀咗意見呀!!!

不過呢,我想講,談講道嘛,真係認真便輸了。家陣大把牧師傳道,上講台吹水唔抹嘴;又有大把人,上講台當炮台講政見。 唔好意思,係我睇錯咗講台嘅功能,崇拜其實係畀(上帝)面派 對,應該你有你發炮、我有我瞓覺,唔唔,其實咁就好 OK 啦! 我做乜會無啦啦認真咗?無咩事嘅我都係返埋個位度(瞓覺) 先,sorly sorly。

#### 崇拜與世界的平行時空

曾經有句說話:「如果想得到心靈嘅平靜,就返教會啦。」對,教會崇拜的氛圍真的好平靜——平靜到一個地步,在這個混亂的世界之中,崇拜就好像存在於一個平行時空,兩者完全沒有交集一樣!

面對近年逐漸緊張的香港政治局勢,教會在崇拜中,又有甚麼應對呢?當香港近年發生過好幾次重大政治事件,由 2014 年公民廣場、兩傘革命、魚蛋革命,近至 DQ 案等等,甚至天鴿吹襲澳門引致嚴重的人命財產損失(已相對「不政治」),我在崇拜中,都會特地留意教會在報告中有沒有講講相關的事——無,一粒字都唔會講,好似完全無發生過呢啲事咁,世界一樣咁平靜。唔知點解,教會好似生存喺一個平行時空咁,就係:唔使應對,繼續馬照跑、舞照跳、崇拜照開、詩歌照唱。

對我而言,這種崇拜給我「出人意料的平安」,才是我感到 強烈不安的根本源頭。崇拜是教會最具代表性的活動,這個活動,直接反映了教會對世界的取態。教會應該要做到「出世而又 入世」。當這個世代,很多人屈服在中國不公義的強權之下,教

會應該要用「比世人更勇敢的方法」(出世),「回應時代的需 要」(入世)。點知,而家教會嘅方法真係好「勇敢」,就係反 其道而行,離地到宇宙銀河系。

喔,其實唔係嘅,教會就住同性議題咪會出聲囉!又或者, 之前我就曾分享過有牧者公然在台上發表「本土派為香港帶來破 壞」之論,更有讀者分享牧者在講台上「讚梁振英」、「反對台 獨」。<sup>7</sup> 綜觀而言,教會親政府絕非冰山一角之事。其他事情都 不聞不問,一有同性議題、要撐政府就即刻衝出嚟柒,我都唔知 有咩好講啦。

\*\*\*

說了這麼久,其實我們都忘卻了崇拜的真正意義:它應該是 對上帝的一種崇敬、頌揚,一種讚美、尊崇。真係羞愧,點解好 好地一個崇拜,會變咗搵佢嘅千奇百趣?上帝的位份在哪?

由上述可見,一場崇拜是否到位,不論會眾、傳道同工,都 有責任。現在的會眾,坦白講是縱壞了,以為自己是消費者,嚟 崇拜係嚟睇 show、參加畀面派對,心裡頭對崇拜的種種細節評 價有幾多分;或者只為參加而參加、因為班 friend 一齊參加而 參加,然後遲到早退玩電話;傳道同工為「遷就」會眾,講道出 盡奇招,變成棟篤笑先得;又有多少同工,居然因為個人政見, 拋棄公義與尊敬講台之心,講台當炮台發表親中言論,更是噁 心。如果上帝仲係舊約嗰位上帝,可能我哋全人類都被佢用雷劈 死。

但,如何回到「最初的本心」?我覺得,歸根究底就是,你 願不願意思考。我發覺,當你願意去思考所有事情,縱使它們一 再重複,你也會找到有趣的地方。我常常覺得,神浩人,並不希 望我們是機械人,而是希望我們嘗試透過神的目光、眼睛,每一<br/> 刻檢視信仰的意義。在文中,我們談到崇拜中光怪陸離的種種事 情,有幾多是你的寫照?又有幾多值得我們去反省悔過?在這個 大環境中如此微小的我們,又可以作甚麼事情,令環境有所改 變?這,都是我希望眾人能一再思考的問題。

<sup>7</sup> 感謝讀者 Tsui Kai Lung 提供。

# 信耶穌能解決所有問題? 探討解難神學

「解難神學」這個名字是我自創的,因為我找不到一個比較 貼近又解釋到此概念的字眼。不知為何,教會常常有種論調,就 是「世間上所有的問題,都可以靠信耶穌解決」;又或者反過來, 說人為甚麼會「無法解決眼前的問題」,就是因為未接觸福音、 未信耶穌。本身我以為寫一篇文章就夠,誰知道寫著寫著,一發 不可收拾,原來這個觀念根本深植在每個基督徒心中。於是我決 定,這次在第二集中用一整章去談談,甚麼是「解難神學」。

### 上帝就是解決世間所有問題的鑰匙?

#### 解難神學簡介

話說聖經中的信徒,經常以為耶穌在世是要在政治上成為 王,釋放他們被「殖民」的身分。耶穌三番四次同佢哋講,「我 嚟係要拯救失喪嘅靈魂」,但係無人夠智力(或者聰明)明佢講 乜。同樣地,我覺得今時今日的信徒同樣跌入了一個迷思,就是 以為耶穌在世,是要解決世間所有問題。

戴番個頭盔先,其實我沒有在甚麼神學書籍中看過「解難神 學」這個字眼,甚至 google 過也不見。想講這個題目,純粹是 個人在教會經驗中發覺這個概念。如果要我定義甚麼是「解難神 學」,我會說是一種心態,一種「上帝就是解決世間所有問題的 鑰匙」的心態。不知大家有沒有這樣的經驗?當你陷入一些困境 難以解決、想找人傾訴,如果你不幸找上「解難神學」式耶膠徒, 他們總會不斷問你:「你所處嘅困境中嗰啲身邊嘅人,係咪都係 信耶穌啤?」「畀多啲信心主啦!」「上帝總會為你開路!」諸 如此類。這,就是「解難神學」啦。

#### 「解難神學觀」的體現方式,包括認為:

- 1. 上帝是解決世間所有問題的鑰匙。上帝好似一部「解決煩 惱之無敵 ATM」。無錢,搵上帝啦!無工做,搵上帝啦! 無拖拍, 搵上帝啦! 有問題, 搵上帝啦!
- 2. 所有人都信耶穌,就可以解決世間所有問題。身邊有很多 人未信耶穌,所以我們應該不斷向身邊的人傳福音(或者 祈求他們快點信)。他們信後,就會有「基督的心陽」, 咁就可以解決世間所有問題。
- 3. 在傳福音時,側重在「上帝如何幫我解決困難」這個論點 ⊢ ∘

#### 持有「解難神學觀」的人,他們是如何實踐信仰的?

1. 就上述第一點而言,「解難神學觀」追隨者會呈現一種「拜 黃大仙心態」。在祈禱和與上帝的互動之中,大部分時間 都在講「天父求你讓我可以點點點」,講見證亦只強調「感 謝神,幫我解決咗乜乜乜問題」。

2. 就第二點,「解難神學觀」追隨者認為世間上事情,包括 政治、社會、感情,只要涉及這些範疇的人,佢哋全部信 哂主就無問題。

睇到呢度,我唔知大家點睇,但可能已有人覺得,其實「解 難神學」同「成功神學」都好似下喎?雖然它們有相同,但也有 不同的地方。那為甚麼我們會傾向相信信仰能幫助我們解決問題 呢?我想到以下幾項原因:

- 1. 宗教的功能:一個宗教本身,必須要有「為人解決問題」 這一個功能。如果一個宗教的神不存在這個功能,都好難 搵人信佢啦。
- 2. 教會長期的教導:由老早一開始傳福音,教會都係咁講。
- 3. 基督教信仰在一定程度上解釋了形而上的問題:例如生 死、死後生命、人存在世上的目的……等等。這些言論, 的確多多少少「解決」了我們對生命存在、生命價值等等 的問題。
- 4. 成功神學後遺症:當我們認為上帝能帶給我們成功,即是 代表我們認為祂可以幫我們解決「成功」路途上的障礙, 所以上帝的其一中個主要的功能就「變成」了「解難」。
- 5. **好 sell**:除了「賣得」之外,大概更重要的原因是,因為 太強調「愛」(另外當然就是「成功」啦)。因為太強調 愛、太強調成功,所以「神係唔可以唔幫我哋」。長久以

來的教會教導亦傾側在這個方向,而導致信仰失衡,令我 們不得不在日常生活中,吹嘘「上帝如何帶給我們各種的 幫助」。當然,我不否認這個可能是事實,但是當這變成 信仰的中心或者唯一,就會有問題。

6. 泛靈恩派後遺症:靈恩派的信仰觀著重感受,強調、誇大 見證體驗。

上述可見,一個宗教(或者基督教)具有「解決問題」的功 能,是必須甚至是無可厚非的。問題在於,如果我們與神的關係, 「幾乎」只關心解決問題的功能,而忽略其他的部分,咁就係有 問題。其實這種心態最可笑的是,耶教徒經常強調「我哋唔係拜 緊黃大仙呀!」「我哋當天父係爸爸咁嘿!」但口裡說不,身體 卻很誠實,一味向上帝諸多需索的同樣是我們。

而十分危險的是,以往我描述「耶膠」,他們是真的「膠到 出汁」,行為惹人側目那種;但是,持有「解難神學觀」的人可 不是「純耶膠」。沒有人會大剌剌說自己信「解難神學」,但 我敢說,其實有不少耶教徒,心裡多多少少都存在這種神學觀。 而這種神學觀,深植在耶教徒心中,影響甚廣。記住這兩點,在 下一篇我會以政治為例,探討這種神學觀如何影響我們的思考方 向,以及其問題所在。

你呢?讀著這本書的你,是「解難神學觀」的追隨者嗎?

### 解難抽學的生活體現——政治管

在教會中,我們不難聽到「為高官祈禱」之類的言論,而在 耶教徒中,更普遍有一種認為「高官信哂主就好似解決到世界上 所有問題」的想法。不少教會的教導是,「邊個係基督徒,選舉 就投邊個啦」,更甚的是「邊個係基督徒加反同,選舉就投邊個 啦」。

既然有人咁諗,不如我哋又睇下有幾真確吖。我哋一齊數下 近十年嘅高官基督徒名單:8

天主教徒	基督教徒	
曾蔭權、林鄭月娥	林瑞麟、黃仁龍、李少光、鄭汝樺、邱騰	
	華、蘇錦樑、譚志源、陳茂波、何君堯	

看到這裡,相信大家已經明白到一點,就是「高官信咗主, 唔代表佢會做好嘢」。上述的名單中,有不少聲名狼藉者,更是 官司纏身。做得高官,多是助紂為虐、為虎作倀,哪位真的有「行 公義、好憐憫」過? (除了黃仁龍我覺得是合格之外……) 一般 基督徒妄想在上位者成為教徒就等於整個社會無問題,真係未免 太天真。這班高官作為在上位者,有沒有運用他們擁有的權力, 去為香港人爭取公義?我們見到的只有下列這幾點:

- 1. 助紂為虐,為不公義的政權塗脂抹粉;
- 2. 屢次「擺上帝上枱」,發出不少「以父之名」的言論,包 括「上帝叫我參撰」等等。
- 3. 以基督徒的身分為自己的政治前途化妝,已成為「上位」 的其中—個手段,例如何君堯。要知道耶教徒本身已經政 治冷感,每次有咩選舉,只要撻「基督徒」三隻字,總會 無啦啦吸到啲票。而我夠膽講,其中一啲選民,就係懷住 「在上位者只要係基督徒就能解決政治同社會問題」呢一 種思想。基督徒的名聲點解會江河日下,其中一個主要原 因,必然是有很多政客不斷消費「基督徒」呢個「朵」。

由此可見,他們的確是信耶穌,但有沒有活得「像耶穌」? 沒有。「信耶穌」其實不是重點,信了之後「活得像耶穌」才是 重點呀!他們既然沒有以基督徒身分,在自己的政治崗位上盡 忠,他們就不單是得罪了上帝、違背了道德,更是侮辱基督徒的 名!如此一來,即使「所有高官信哂耶穌」咁又點?他們由始至 終都背棄了基督徒的身分!

#### 解決不了問題的原因在於人,不在於神

這些年來,不止一位朋友向我提過,「其實點解無人試下好 似無間道咁進入政府機構做臥底,做夠三五七年做到變高官,之 後先公開自己係民主人士嘅身分,憑佢哋嘅政治影響力,為社 會甚至教會作出制度上嘅改變?」我的結論嘛,就是當你做夠

<sup>8</sup> 何志光,〈政治入侵教會的時代〉,時代論壇, 2012 年 7 月 8 日,網址: https://bit.ly/2vP4pio

三五七年做到高官之位時,會與很多失敗的臥底一樣,真正變成 親共一分子。基督徒高官的情況亦一樣,可能一開始他們進入政 治體制中,都懷有理想和希望,期望活出基督的愛與公義;但, 過得三五七年,他們被同化了,屈服在安逸、金錢和權力之下, 背棄了基督徒的初衷和身分。

所以,「高官信耶穌」這件事本身,是沒用的,更無助解 決複雜的社會問題;而如果你是相信民主自由的耶教徒,請放 棄「高官信哂主就好似解決到世界上所有問題」的無聊幻想, 他們唯有在崗位上活出神應有樣色,秉持上帝的公義和憐憫, 咁先有用!唯有他們這樣做,才會被其他人「另眼相看」,覺 得「原來高官之中都有好人。原來佢仲係一個基督徒添!基督 徒真係好啦!」大佬呀,咁先係傳褔音呀嘛!所以,而家呢班 友?除咗用偽君子三隻字形容之外,我都唔知講咩好啦!

#### 解難神學的生活體現——傳道篇

不論你返教會好耐又或者你未返過教會,傳福音或「被」傳 福音時,應該都會聽過咁嘅講法:「信耶穌啦,信耶穌會解決到 你而家面對嘅困難嘿!」大家又覺得係咪真?

#### 傳道方向的走偏 —— 神變成解決問題 ATM

有一點點返教會年資的話,應該知道甚麼是「監獄佈道」、 「醫院佈道」之類。小妹有一段時間也曾參與「醫院佈道」,遇 過一個老尷的情況,就是為醫院病人祈禱,「求神醫治佢嘅病 痛」。但其實如果神真的幫我們解決一切困難,為甚麼我們還要 為臨死的人祈禱,然後說,「上帝呀求你醫治佢」?家陣擺到明 就係佢無「被醫治」啦!仲講咩「被醫治」,真係唔覺得好贈興 嗎?

不僅在佈道上,著名耶教煩膠節目《恩雨之聲》,正正是此 信念的體現。每次見到 Road Show 播我就燥底:當個節目一日 到晚吹嘘上帝幫人解決問題,咁睇嘅人自然只會將「上帝可以幫 我解決問題」連成一線。(好在佢已經停播~)

這就是我對「恩雨之聲式見證」這麼不滿的原因之一。我認 為,耶教偏向避開解釋苦難,除了是因為這問題本身真的很難回 答之外,更重要的是因為耶教現今強調了「解難神學」與「成功 神學」——「信耶穌」變成易入口的(無營養)零食,並容易吸 引無知婦孺或不想思考的人相信。可悲的是,「成功神學」或者 「解難神學」的確是一種易入口的信仰觀。如果有人對你說, 「信耶穌就可以解決你的難題、讓你獲得成功!」試問哪位不心 動?基督教會正正是抓住這種即食的心態來吸引人信主,為的其 實就是「人數」二字而已。不錯,這樣的信仰出發點是很吸引, 但是它能吸引到的又是哪一種人呢?不就是只想「在信仰中攞著 數」又或者是「立心不良」的人嗎?這樣的傳福音方向,又有多 正確?我實在不敢說是有多好。

作者: 殷琦

編輯: 黄斯淳

插畫: Jackie Lam

設計: 4res

出版: 紅出版(青森文化)

地址:香港灣仔道133號卓凌中心11樓 出版計劃查詢電話:(852) 2540 7517 電郵:editor@red-publish.com

網址:http://www.red-publish.com

香港總經銷: 香港聯合書刊物流有限公司

台灣總經銷: 貿騰發賣股份有限公司

地址:新北市中和區中正路880號14樓

電話: (886) 2-8227-5988

網址:http://www.namode.com

出版日期: 2018年7月 圖書分類: 宗教/基督教

ISBN: 978-988-8490-80-6

定價: 港幣88元正/新台幣350圓正



### 前作反應激烈,千呼萬喚捲土重來 繼續嘻笑怒罵,數盡教會荒誕



「信耶穌就能解決所有問題啦!」

要做傳道人,首先要被檢討愛情史

異教、異端、邪教傻傻分不清

「他抽煙又不信神,就算是好人也要下地獄呀!」

# 「上帝叫我參選!」

「教會紛爭, • 教內解決。」

唉,真是上帝躺著也中槍

「地上的法庭無權插手教內事務!」



「她(作者)所描述教會事情的種種,假若她沒有參 與教會生活,也沒有與教會中人士交通、聆聽和分享, 必不能那麼深入知悉教會中的事。」

> ──**袁天佑** 香港循道衞理聯合教會牧師

「殷琦一直『堅(不)離地』寫這本書,全方位立體 掃描基督新教堂會的內部運作,同時緊緊抓住讀者的 好奇心,讓他們理解這些光怪陸離的現象。」

> ──**陳士齊** 香港浸會大學宗教及哲學系高級講師

「她(作者)對教會的問題有良好的觀察力和洞察力, 能夠從多角度探討,不拖泥帶水,直擊要害,是近年 反思教會問題的佳作。」

----施諾

經典作《令人噴飯的謝飯》作者





專業出版 國際銷售

**《**紅出版文化平台

Mod<sup>®</sup>E

上架建議:宗教/基督教

定價:港幣 88 元正/新台幣 350 圓正